

Gian Ramming daventa schef svilup tar RTR

■ (rtr) Gian Ramming, schefredacteur e commember da la direcziun RTR, daventa a partir dal 2017 manader da la nova partiziun svilup tar RTR. Il medem mument datti ina midada organisatorica en la direcziun da RTR. Il svilup digital mida il diever da medias ed ils bassegns da la populaziun cuntinuadamain. RTR sa prepara per questas sfidas futuras e crescha perquai ina nova partiziun che vegn a s'occupar dals svilups da l'interpresa. La chasa da medias publica per la Svizra rumantscha duess uschia vegnir rinforzada a lunga vista, quai era per pudair ademplir las aspectativas da las Rumantschas e dals Rumantschs ad ina chasa da medias dal futur. A partir dal 2017 vegn Gian Ramming a manar questa partiziun sco schef dal svilup tar RTR.

Ladina Heimgartner: «Jau deploresch d'ina vart fitg da perder in schefredacteur da la qualidad da Gian Ramming, sun dentant cuntenta che ses grond know-how, sia experienscha e ses bun nas per innovaziuns survegnan in terrain gist tant fritgaivel cun la nova posiziun.»

Gian Ramming lavura dapi 13 onns per RTR. Dapi il 2009 è el s'engaschè sco schefredacteur per l'interpresa RTR ed ha furmà quella considerablmain. Sut sia batgetta èn formats da radio e televisiun cumprovads vegnids sviluppads enavant e novs formats èn vegnids lantschads cun success. Uschia per exempel l'emissiun

da novitads per uffants «Minisguard» ubain las emissions spezialas da votaziuns ed elecziuns a la televisiun. Era la purschida d'online sin rtr.ch è vegnida engrondida successivmain sut l'egida da Ramming.

Gian Ramming: «Set onns captivants, set onns ch'èn stads influenzads d'in mund da medias fitg variant e cun blers svilups. Jau sun engraziaivels che jau hai pudì influenzar decisivmain la via da RTR sco schefredacteur tras questas midadas.»

Tras la midada da Gian Ramming è la piazza da la schefredactura resp. dal schefredacteur RTR vacanta. RTR vegn a publitgar l'inserat per questa piazza las proximas emnas.

Reorganisaziun da la direcziun

Sper questa midada realisescha RTR il medem mument ina reorganisaziun interna. La manadra comunicaziun daventa commembra da la direcziun RTR. Plinavant vegn entras la fusiun dal stab da direcziun e la gestiun commerciala empitschnì l'organigram. Uschia sa cumpona la direcziun da RTR en futur da: Ladina Heimgartner (directura), *Tamara Deflorin* (scheffa comunicaziun), *Beat Lozza* (schef servetschs centrals), *Pius Paulin* (schef tecnica), Gian Ramming (schef svilup) sco era il post vacant da schefredacturA.